

**Ilinniarfinni meeqqallu atuarfiini attaveqaqatigiinnikkut teknologip ukunatigut atorneqarnerata annertusarneqarnissaanik attaveqaatillu pitsanngorsarneqarnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut:**

1. Internetsi ilinniarfinni atuarfinilu tamani killilersugaanngitsumik atorneqarsinnaalersinneqassaaq.
2. Attaveqaatit pitsaanerpaat (sukkanerpaat) ilinniarfinni tamani pilersinneqassapput.
3. Ungasianiit ilinniartitsinerup atorneqarnerulernissaa siunertaralugu “ungasianiit ilinniartitsivimmik” pilersitsisoqassaaq. Ungasianiit ilinniartitsinerup pingaarnertut salliutillugulu suliarissavaa nunaqarfinni meeqqat atuarfiini atuartitsissutit ilinniartitsisussaaleqiffiusut naammaginarfumik atuartitsissutaalernissaat anguniassallugu.

*(Inatsisartunut ilaasortamit, Kaali Olsen-imit, Inuit Ataqtigiit saqummiunneqartoq)*

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**ISUMALIUTISSIHSUTAA**

**Siunnersuutip aappassaanneernejarnerani saqummiunneqartoq**

Ataatsimiititaliaq suliarinninnermini kingullermik ukuninnga ilaasorta qarpoq:

Harald Bianco, Inuit Ataqtigiit, Jane Petersenimut, Inuit Ataqtigiit, sinniisoq

Andreas Uldum, Demokraatit, siulittaasup tullia

Hans Aronsen, Inuit Ataqtigiit

Ruth Heilmann, Siumut

Aleqa Hammond, Siumut

UKA2010-imi ulloq 12. oktober siullermeerinninnerup kingorna siunnersuut ataatsimiititaliap misissorpaa taamaalillunilu isumaliutersuutini Inatsisartut aalajangernissaannut tunngavissamik naleqquttumik saqummiilluni.

**Siunnersuutip imarisaa siunertaalu**

Kalaallit Nunaanni ilinniarfeqarfinni atuarfeqarfinnilu qarasaasiaqarnikkut attaveqaatinillu (IKT-imik) atuinerup tamakkiinerusumik nukittorsaneqarnissaa Naalackersuisut sulissutigissagaat siunnersuuteqartup siunnersuut una aqqutigalugu kissaatigaa. Taamatut anguniagaqarneq ilinniarfeqarfiit atuarfeqarfiillu internet-imik killeqanngitsumik atuinissamut matumani sukkassutsit pisinnaasallu annertusiat ilanngullugit periarfissaalissasoq siunnersuuteqartumit isumaqarfigineqarpoq. Tamatuma saniatigut ungasianiit ilinniartitsineq pillugu qitiusumik aqutsivimmik pilersitsinikkut ungasianiit ilinniartitsineq nukittorsarneqarsinnaassasoq eqqarsaataavoq.

**Inatsisartuni siunnersuummik suliarinnineq**

Siunnersuutip siullermeerneqarnerani oqallinneq partiillu oqaaseqaataat tunngavigalugit siunnersuummi siunertaasut Inatsisartuni ataatsimut isigalugu taparserneqarpoq.

Naalackersuisut akissuteqaamminni siunnersuut akuersissutigineqassasoq inassutigaat, taamaattorli siunnersuut qanoq aningaasalersorneqassanersoq nassuiaatiginagulu tikinngilaat.

Inuit Ataqtigiit siunnersuut tamakkiisumik taparserpaat, oqaatigalugu nunami inuiaqatigiinni agguataarsimanermi IKT-ip periarfissarititai annertunerusumik atortariaqaraat, minnerunngitsumik illoqarfinni minnerusuni nunaqarfinnilu ungasissumut ilinniartitsinermi. Internetimik atuneq akisuvallaartutut aammalu IKT-imik atuinermi killilersuisutut partimit isumaqarfigineqarpoq, taamaattumillu ilinniartitaanermut immikkoortortaqaarfimmut partimit Internetimik atuinermut ingerlatsinermut tapiisinnaanermut periarfissat mattusimaneqanngillat imaluunniit TELE A/S-imut annikinnerusumik tapiinissamut periarfissat. Ataatsimut isigalugu IKT-imit periarfissat ammaanpeqartut pitsaanerusumik atorneqarsinnaanerat partimit tikkuarneqarpoq.

Siumut meeqqat atuarfiini, ilinniarfinni aamma nunarsuarmi tamani kiisalu inuiaqatigiinni tamani Internetip sakkussatut atorneqarnera innersuuppaat. Internet atorlugu ilisimasaniik paasissutissanillu aallertarpugut. Taakkualu saniatigut partii isumaqarpoq TELE Greenlandip akigititaanit internetimik atuneq annertuumik killilersimaarneqartoq. Taamaattumillu siunnersuutip ilinniartitaanermi IKT-imik atuinerinnarmik pinnani kisiannili ataatsimut inuiaqatigiinnut atugassanngortinneqarnissaa kaammattuutigaa. Kingullertullu parti isumaqarpoq aalajangersimasumik atuinermut akeqartariaqartoq, ilinniartitaanermut immikkoortumuinnaanngitsoq, kisianni inuiaqatigiinni tamani.

Demokratit isumaqarput, ilinniartitaanerup qaffasissusaa ataatsimut isigalugu IKT-imik atuinermi pitsanngoriassasoq. Minnerunngitsumik partimit isumaqarfigineqarpoq isorliunerusuni nunaqarfinnilu IKT-imik atuneq pitsaasumik sunniuteqassasoq, illoqarfinni nunaqarfinnilu ilinniartitsisut suleqatigiinnerata pitsaanerulernissaa annertuumik sunniuteqarfigissagamiuk. Ilanngullugulu partip erseqqissarpaa, siunnersuut ungasissumut ilinniartitsinermi ullumikkornit pitsaanerusumik periarfissiissasoq. Siunnersuut inuiaqatigiinni imminut akilersinnaasutut partimit isigineqarpoq, naak aningaasaliisoqartariaqaraluortoq, kisianni nalilernerqarpoq TELE-mi akit allanngortinneqarnerinut tapiisoqartariaqanngitsoq.

Taamatuttaa Partit Atassut aamma Kattuseqatigiit Partiat siunnersuummut tapersersuipput.

### **Ataatsimiititaliap siunnersuummik suliaqarnera.**

Atuarfeqarfitsinni ilinniarfeqarfinnilu qarasaasianik attaveqaatinillu atuinerup annertusarneqarnissaanut tamarmik immikkut peqataanissaat pillugu siunnersuut arlalippassuarnik imaqarmat aallaqqaasiutigalugu Ataatsimiititaliamit oqaatigineqassaaq taamaalilluni piffissaq ungasinnerusoq isigalugu atuarfimmi atuartut qarasaasianik atuineranut kivitseqataasussaavoq. Taamaalillutik kalaallit qarasaasiaqarnikkut ilinniarsimassutsikkullu qaffassarneqarnissaat siunnersuuteqartup siunnersuutaani pingaarnertut siunertarineqarpoq. Taamaattumik atuarfeqarfinni qarasaasiamik atuinerup ingerlaavartumik nalimmassarneqarnissaa pillugu sinaakkutissat periusissallu Inatsisartunit ataavartumik eqqartorneqartariaqarmata tamanna Ataatsimiititaliamit pingaartutut isigineqarpoq.

*Siunnersuutip ataatsimiititaliamit suliarineqarnerani Naalakkersuisumik apersuinerit, apeqqutit ataatsimiinnerillu.*

Siunnersuutip suliarineqarnerani Ataatsimiititaliamit Ineqarnermut, Attaveqarnermut Angallanermullu Naalakkersuisoq apersorneqarpoq. (Ilanngussaq 1). Ilanngullugulu siunnersuutip Ataatsimiititaliami suliarineqarneranut atatillugu, Ataatsimiititaliaq marloriarluni Naalakkersuisunut arlalinnik apeqquteqartarsimavoq. (Ilanngussat 2 aamma 3). Kiisalu ataatsimiititaliamit TELE Greenland A/S, kiisalu Atuarfik Samuel Kleinschmidt pulaarneqarsimapput, tassani ataatsimiititaliaq periarfissinneqarluni ungasissumut ilinniartitsinermi periutsit suut atorneqartartut malinnaaffigisinnaallugit. Ilanngullugulu Ataatsimiititaliaq ilisimatinneqarpoq, ungasissumut ilinniartitsinermi misileraalluni ingerlataqartoq - Atuarfik Samuel Kleinschmidt – Kapisillit (Ilanngussaq 4).

Tamatuma saniatigut siunnersuut ataatsimiititaliap 2010-imi aamma 2011-imi ataatsimiinnerni arlalinni suliarisarsimavaa.

*Aningaasatigut kingunissai pillugit isumaliutit*

Ataatsimiititaliamit malugineqarpoq, Naalakkersuisunit siunnersuut akuerisassanngorlugu inassutigineqartoq, kisiannili siunnersuutip aningaasatigut kingunissai oqaaseqarfiginagit, tamanna Ataatsimiititaliamit annertuumik ajuusaarutigineqarpoq.

Akissuteqaatip ilusilersorneqarnera tunngavigalugu tamanna ataatsimiititaliamit ima paasineqarpoq Naalakkersuisoqarfik immaqa aningaasaliissutaareersut iluini aningaasalersuinerat pisinnaassasoq. Taamaattumik tamanna tunngavigalugu Ataatsimiititaliap Naalakkersuisut kaammattussavai siunnersuutip aningaasatigut kingunissai tamatumalu kingunerisaanik aningaasalersuinissamut periarfissat iluini killiffiit suunersut pillugit nassuiaasioqqullugit.

Aningaasatigut kingunissaasa isumaat minnerulinngilaq, naalakkersuisut ulloq 6. oktober 2010 akissuteqarlutik allagaqarmata siunnersuutip aningaasatigut kingunissai naatsorsorneqarsinnaanngimmata siunnersuut itigartinneqartussatut inassutigalugu. Ulloq 7. oktober 2010 akissutitut allagaqaat iluarsineqarpoq, aningaasatigut kingunissaasa eqqarsaatersuutigineqarsimaneri peerneqarsimallutik, aammalu Naalakkersuisut inassutigalugu siunnersuut akuerineqassasoq.

Ataatsimiititaliamit ilimagineqarsimavoq, Nunatta karsianut siunnersuutip aningaasatigut kingunissaannik Naalakkersuisut eqqarsaatersuuteqarsimasut. Ajoraluartumilli ilimaginnineq eqqortuunngilaq, tamannalu takuneqarsinnaalluni Naalakkersuisut Ataatsimiititaliap apeqqutaanut akissuteqaataanni kiisalu Ineqarnermut Attaveqarnermut Angallanermullu Naalakkersuisumik apersuinermi.

Suliaq imaalillugu eqikkarneqarsinnaavoq, siunnersuut tunngaviatigut tamakkiisumik taperserneqarluni, kisiannili aningaasatigut kingunissaritinneqartut annertuut maannakkut aningaasatigut tunngavissani nassaarineqarsinnaanngitsut piviusunngortinneqarnissaanut piumasaaqatitaqarluni.

*Ataatsimiititaliap naggataarutaasumik oqaaseqaatai*

Qarasaasiatigut piginnaasaqarneq siunissami paasissutissiinermi teknologi-mi periarfissarpassuarnut pingaaruteqarnera pissutigalugu innersuunneqartariaqartutut isigineqartariaqarpoq. Inuiaqatigiinni ineriartornerup siornatigornit pisariaqarnerulersippaa inuit qarasaasiatigut ilinniagaqassutsikkullu piginnaasallit oqartussaasunik inuiqatigiinnillu attaveqarnissaat. Tassani eqqarsaatigineqarput ilaatigut innuttaasunut qarasaasiatigut iserfissat kiisalu innuttaasut allaffissornikkut attaveqarnissamut periarfissaat.

Ataatsimiititaliaq isumaqatigiittoq isumaqarpoq teknologiikkut ineriartorneq inuiaqatigiinni immikkoortunut toqqakkanut kisimi pinnani innuttaasunullu tamanut iluaqutaasariaqartoq. Tunngaviusumik isigalugu ilinniartitaanermut tunngasuni aningaasalersuineq aningaasaqarnerup imminut napatittup ineriartortinneqarnerani annertuumik pissarsissutaasinnaagaluarpoq, aningaasalersuinerilli taamaattut inuiaqatigiit immikkoortuini tamani anguniakkanut pingaarnersuinerimullu sanilliullugit aamma isiginiarneqartariaqarput. Inuiaqatigiinnik ingerlalluurtunik pilersitsissagaanni suliniutit siamasissut ataqatigiissaarluakkallu, ataatsimoortumik pilersarusioreernikkut aallarnisarneqartut pisariaqarput. Naammanngilaq imminut aperissalluni siunertaq tapersersussallugu naleqquttuunersoq, tamatuma peqatigisaanik inuiaqatigiit sinnerisa pisariaqartitaannut siunertap tamatuma siuarsarneqarnissaa qanoq naapertuutsiginersoq isumaliutigisimanngikkaanni. Taamatut isumaliutiginninneq siunnersuut matumani pineqartup annertuumik aningaasartuuteqartoqarnissaanik nassataqartussaananit taperserneaqannarpoq.

Ataatsimiititaliaq isumaqatigiittoq isumaqarpoq teknologiikkut ineriartorneq ima siuarsarneqartariaqartoq pisortanut namminersortunullu aammalu minnerunngitsumik innuttaasunut nalinginnaasunut annertunerpaamik iluaqutaasussanngorlugu. Immikkoortut allat, soorlu Peqqinnissaqarfiup, pisariaqartitaasa aningaasaqarnikkut allatigullu pisariaqartitaasa naliliivigineqarnerannut tamanna ataqatigiissinneqanngippat ilinniartitaanermut immikkoortortap IKT-mik atuinissamut pitsaanagerusumik kisimi periarfissinneqarnissaa ataatsimiititaliap tapersersinnaanngilaa. Taama oqareerluni suliffinni attaviit atornerqarsinnaasut august 2010-mi 13 megabytemit 95 megabytemut annertusitinneqarnissaat Naalakkersuisut iluatsissimagaat nuannaarutigigamiuk ataatsimiititaliap oqaatigissavaa (tak. Naalakkersuisut Aningaasaqarnermut Ataatsimiititaliamut sept. 2011-imi akissutaa). Tamanna aningaasaliissutaasut iluanni allaat ingerlanneqarsinnaasimalluni. Taamaalillunilu siunnersuuteqartup anguniagai tamakkiisuunngikkaluamik malinneqarput.

21. oktober 2011

UKA2011/15  
UPA2011/18  
UKA2010/39

Taamaattumillu siunnersuut qanorluunniit tapersersornatigigaluarpat  
akuersissutigineqarnissaa ataatsimiititaliamit inassutigineqarsinnaanngilaq.

**Ataatsimiititaliap inassuteqaatai**

Ataatsimiititaliap isumaqatigiittup siunnersuut itigartinneqassasoq inassutigaa

Taama oqaaseqaateqarluni isumaliutissiisummilu allassimasutut paasinnilluni  
ataatsimiititaliap siunnersuut aappasaanigassanngortippaa.

21. oktober 2011

UKA2011/15  
UPA2011/18  
UKA2010/39

Harald Bianco,  
Sinniisoq

Andreas Uldum,  
Siulittaasup tullia

Hans Aronsen

Ruth Heilmann

Aleqa Hammond